

BINAUJE, ON' OME !

Dispû lès-ans èt lès razans
Qu'on dit qui l' payis è-st-en pane ,
On p'tit payis qu' nos paurtichans :
Si lon qu' dji m' sovin, on nos tane.
On-z-a profité dès Flaminds
Dès-anéyes au long, s'apinse zèls ;
Nos ratayons, nos grands- parints
Aurin.n' sitî branmint trop fèls.
On dîreut qui l' batch a r'toûrné
Su l' pourcia, èt qu' c'è-st-on' oradje,
Pôussé pau grand vint qu'a sèré
Nos-ûsines èt nos tchèrbonadjes.
Lès Walons d'manderint l' chârité
À leûs vvèsins qu'ont yeû d'pus d' chance ?
I sèrin.n' oblidjîs d' briber ?
On l'zî consiye d'aler en France.
Qui ça fait mau d'ètinde tot ça !
C'è-st-on près-parint qui nos r'nîye ;
Nos lès purdans po dès boûrias,
Grognauds, èt mau-ruv'nants afiye.
Mins dji zoupèle di binaujeté
Pace qu'on vint d'anonci au posse
Qu'on' Anvèrswès vint di d'mander
Qu' nos l'aspalanche po gangnî s' crosse.
I s' fait qui, po sès mouches d'api,
- One boune cinquantin.ne di tchètwêres –
Èle sont bleuwes qui po-z-assoti,
Di golzau qu' lès Flaminds 'nn'ont wêre !
On n' compte pus lès bonîs pâs ci,
Gn-a qu'à s' porminer au mwès d' maîy
Quand l' solia lût, tot ça r'glatit
On mwès au long d'avant qu' ça n' ritchaîye.
Li mouchî d'Anvèrs' èt l' cinsî
Si vont sièrvu dès mouches à l' laume
Po nuker lès fleurs èt r'lancî
L'amichté d'on lan, d'on côp d' gôme.
Binauje, on' ome, quand dj'a compris
Qu'on-z-a r'tové paîs èt bouneûr ;
Dji tin à l'zî criyî merci
Aus-omes qu'ont r'mètu l' monte à l'eûre.
Si lès cis qui mwin.nenut l' payis
Pôrin.n' tûzer, rin qu'one sègonde
Qu'on p'tit côp d' mwin fait tant plaîji :
À leû toû d' rapaujî tot l' monde.

Albert Delvaux Maîy 2016